

FRÁSÖGN

af sumarfundi forsætisnefndar Norðurlandaráðs í Bodø 25.–27. júní 2013

Sumarfundur forsætisnefndar Norðurlandaráðs var haldinn í Bodø í Noregi 25.–27. júní sl. Af hálfu Íslandsdeildar Norðurlandaráðs sóttu fundinn Höskuldur Þórhallsson, formaður, og Helgi Hjörvar, auk Lárusar Valgarðssonar ritara. Helstu mál á dagskrá voru öryggismál, fjárhagsáætlun Norrænu ráðherranefndarinnar 2014, vorþingfundur Norðurlandaráðs 2014, sameiginlegt málþing Norðurlandaráðs og Vestnorræna ráðsins 20.–22. ágúst nk., Þingmannaráðstefna Eyrstrasaltssvæðisins 25.–27. ágúst nk., verðlaunagripur Norðurlandaráðs og ráðning framkvæmdastjóra Norðurlandaráðs.

Öryggismál voru til umfjöllunar undir tveimur dagskrárliðum. Annars vegar samþykkti forsætisnefnd drög að dagskrá hringborðsumræðna um varnar- og öryggismál 30. september nk. í Helsinki sem ráðið stendur fyrir í samstarfi við NORDEFECO, norræna varnarmálasamstarfið Nordic Defence Cooperation. Áætlað er að umræðurnar verði með þátttöku norrænna ráðherra sem fara með varnarmál, formanna norrænna fastanefnda sem fara með varnarmál, yfirmönnum landvarna norrænu landanna, fulltrúum NORDEFECO, fulltrúum Færeyja, Grænlands og Álandseyja auk forsætisnefndar Norðurlandaráðs. Forseti Norðurlandaráðs, Marit Nybakk, frá Noregi, mun stýra hringborðsumræðunum.

Hins vegar var lagt til að forsætisnefnd stofnaði starfshóp um varnar-, utanríkis- og samfélagsöryggi til að fylgja eftir vorþingfundi Norðurlandaráðs 11. apríl sl. þar sem sérstök áhersla var lögð á utanríkis-, öryggis- og varnarmál ásamt samfélagsöryggi, til að undirbúa hringborðsumræðurnar um varnarmál 30. september nk. og til að undirbúa aðrar hugsanlegar hringborðsumræður sem falla undir þessa málaflokka. Samhliða var lagt til að hópurinn yrði með svipuðu móti og starfshópur forsætisnefndar um fjárhagsáætlanir, svokallaður fjárlagahópur, sem í sitja fulltrúar flokkahópa Norðurlandaráðs, og að í hópnum mundu sitja fulltrúar landsdeilda Norðurlandaráðs. Fulltrúar flokkahóps miðjumanna voru fylgjandi tillögunni en fulltrúar flokkahópa hægri manna og jafnaðarmanna voru mótfallnir, ásamt fulltrúa vinstri sósíalista og grænna. Ákveðið var að fjalla frekar á næsta fundi nefndarinnar í september um hvernig umfjöllun Norðurlandaráðs um utanríkis-, öryggis- og varnarmál ásamt samfélagsöryggi geti tekið mið af því aukna samstarfi sem orðið hefur í málaflokkunum á norrænum vettvangi á síðustu árum.

Í tengslum við umfjöllun forsætisnefndar um öryggismál á fundinum í Bodø kynnti forsætisnefnd sér starfsemi höfuðstöðva norska varnarliðsins í Bodø fyrir Norður-Noreg og hafsvæðin þar fyrir utan og fundaði með Morten Lunde aðalliðsforingja og Johnny Didriksen sérfræðingi um starfssvið varnarliðsins, þar á meðal um samfélagsöryggi og samstarf við lögregluna, norrænt samstarf, alþjóðlegt samstarf og öryggismál á norðurslóðum. Forsætisnefnd kynnti sér einnig starfsemi miðstöðvar almannavarna í Bodø fyrir Norður-Noreg og hafið þar fyrir utan og fundaði með Bent-Ove Jamtli, yfirmanni almannavarna svæðisins, um björgunarmál og alþjóðlegar björgunaræfingar. Forsætisnefnd Vestnorræna ráðsins var gestur forsætisnefndar í Bodø og tók þátt í heimsóknnum nefndarinnar til norska varnarliðsins og miðstöðvar almannavarna.

Forsætisnefnd fjallaði um tillögu framkvæmdastjóra Norrænu ráðherranefndarinnar um fjárhagsáætlun ráðherranefndarinnar fyrir 2014 og fjárlagahópur forsætisnefndar fjallaði einnig um hana á fundi sínum í aðdraganda fundar forsætisnefndar. Höskuldur Þórhallsson sagði við umræðuna í forsætisnefnd að Íslandsdeild Norðurlandaráðs tæki undir áhyggjur íslenskra blaðamanna og fræðimanna um málefni Endurmenntunarstofnunar norrænna blaðamanna í Árósum, Nordisk Journalistcenter – NJC, og lagði til að fjárveiting til hennar yrði endurskoðuð. Helgi Hjörvar greindi einnig frá því á fundi fjárlagahópsins að Íslandsdeild Norðurlandaráðs

hefði efasemdir um fjárhagsáætlunartillöguna varðandi endurmenntunarstofnunina og Norræna sumarháskólann, Nordisk Sommeruniversitet – NSU. Formaður og varaformaður fjárlagahópsins hittu samstarfsráðherra Norðurlanda á fundi 1. júlí sl. um fjárhagsáætlun Norrænu ráðherranefndarinnar 2014 en síðan munu fulltrúar Norðurlandaráðs funda aftur með fulltrúum ráðherranefndarinnar í september þegar allar breytingartillögur ráðsins liggja fyrir. Ef samkomulag næst mun forsætisnefnd afgreiða nefndarálit um fjárhagsáætlunina úr nefnd 24. september og fjárhagsáætlunin verða samþykkt á Norðurlandaráðsþingi í Ósló 29. október nk.

Vorþingfundur Norðurlandaráðs 2014 fer fram í Hörpu í Reykjavík 7.–9. apríl nk. Þar sem Ísland fer með formennsku í Norrænu ráðherranefndinni á næsta ári og vorþingfundur ráðsins að meginreglu haldinn í því landi sem fer með formennsku í ráðherranefndinni. Ákveðið var að leggja sérstaka áherslu á sjálfbæra nýtingu náttúruauðlinda á fundinum og efna til sérstakrar umræðu um hana.

Sameiginlegt málþing Norðurlandaráðs og Vestnorræna ráðsins verður haldið í Narsarsuaq 20.–22. ágúst nk. í tengslum við ársfund Vestnorræna ráðsins 17.–19. ágúst. Á málþinginu verður fjallað um sameiginlegan skilning á nýtingu lifandi náttúruauðlinda í Norður-Atlantshafi. Í sendinefnd Norðurlandaráðs á málþinginu verða þrír fulltrúar, einn frá forsætisnefnd og tveir frá umhverfisnefnd. Meðal frummælenda á málþinginu verður Halldór Ásgrímsson, fyrrverandi framkvæmdastjóri Norrænu ráðherranefndarinnar.

Þingmannaráðstefna Eystrasaltssvæðisins, Baltic Sea Parliamentary Conference – BSPC verður haldin 25.–27. ágúst nk. í Pärnu í Eistlandi. Forsætisnefnd tók ákvörðun um skipan sendinefndar nefndarinnar á ráðstefnuna sem í eiga sæti fulltrúar norrænu ríkjanna, af Íslands hálfu Helgi Hjörvar. Íslandsdeild Norðurlandaráðs hefur einnig á síðustu árum sent tvo fulltrúa að jafnaði á ráðstefnuna auk þeirra sem sækja hana sem fulltrúar Norðurlandaráðs.

Að lokum tók forsætisnefnd ákvarðanir um innra starf ráðsins. Nefndin ákvað hvaða verðlaunagripur kemur í stað verðlaunaskjals fyrir verðlaun Norðurlandaráðs frá næstu verðlaunaafhendingu í Ósló 30. október nk. í tengslum við þing Norðurlandaráðs. Tíu tillögur bárust í samkeppni um verðlaunagripinn, engin frá Íslandi. Nýi verðlaunagripurinn verður kynntur á almenningsskiptum í Arendal í Noregi 12.–13. ágúst nk.

Þá tók forsætisnefnd ákvörðun um að ráða Britt Bohlin, lénshöfðingja í Jämtlandi í Svíþjóð, sem næsta framkvæmdastjóra Norðurlandaráðs frá 1. janúar 2014.

Frekari upplýsingar má nálgast hjá ritara Íslandsdeildar Norðurlandaráðs og á vefsvæðinu www.norden.org.